

Baez Daih'it

□ Veiz Couyiz / 韦纆怡

Henz dah ndoek geq hwnj rangz moq,
Minzczuz vwnzva goq swncienz;
Fukhwng Cungguck yaek ciengq yiengj,
Dang riengj bouxciepan seizdaih.

Vah cungjsuhgi raeuz geiqmaenh,
Minzczuz vwnzva gaenq fukhwng;
Daj iq gaenx hag gieksaej rwnj,
Haet ndaej cengjhwnj bouxciepan.

Haj gangj seiq gyaeu sam ndiepgyaez,
De dwg baiz raez raeuz cijlu;
Haenqrengz hagsib caez cinbu,
Muenxsim guh ndei byaij baenaj.

Guekgya minzczuz miz loqsiengj,
Lwgnyez giengz daeuj guekgya ak;
Miz lijsiengj couh caezheiq ak,
Guekcoj gak boux cauh ronghsag.

《Dang Ndei Bouxciepan Seizdaih》dan miz
roek souj fwen, hoeng yaek hawj hagseng geiq
hwnjdaej saedcaih hoj lai ha.

Gyanghaet gwn ngaizromh le, gou iteig youq
ndaw fuengz gou baenz coenz baenz coenz son
gyoengqde, naengzlig ciepsouh hagseng ca lai,
cungj geiq mbouj ndaej.

Banningz gou youh louz gyoengqde roengzdaeuj
laebdaeb lienh. Lienh daengz coenz daihngaih,
coenz daih'it youh lumz lo. Hoj lai lo, baenzlawz
guh ne?

Gozging cuengqgyaj le, vunz cungj bae diegrog
lijyouz. Gou miz gienh saeh neix youq ndaw hoz,
gizlawz cungj bae mbouj ndaej, ngoenzngoenz bae

hagdangz daiq hagseng lienh.

Caj daengz gyoengqde ciengq sug le, lij gya
dungcoz diuq foux dem, baez gya dungcoz diuq foux,
gyoengqde youh lumz ciengq fwen.

Vunz ciengz naeuz: Boux vunz raeuz mbouj miz
geijlai naihsim. Gou hix ityiengh, gou siengj vut
gienh saeh neix mbouj guh lo. Gvaqlaeng gou youh
gag naemj: Mbouj ndaej bw, gou guhsaeh soqlaiz miz
gyaeuj miz rieng, baezneix baenzlawz couh
yienghneix guh daengz gyang couh cuengq? Caiq
gangj baez doxdax neix aiq dwg cien bi bungz mbat
nde, gihvei nanz miz, caj daengz “ngwz gvaq cij
mboengj namh, sau haemj cij muengh ngauez” couh

swhgeij gag yienq lo.

Ngeix bae ngeix dauq, gou couh haeb heuj guh,
mboujlwnh geijlai dwgrengz, lienh bae lienh dauq,
ngamq hwnj lwgda, couh bae camgya doxdax lo.

Cien ngeix mbouj daengz fanh ngeix mbouj
daengz, baez doxdax neix dou ndaej ngeih-
daengjciengj.

Baez daih'it neix, soemj van haemz manh miz
rim ndaw sim gou; baez daih'it neix hix itdingh hawj
seiqvunz gyoengq hagseng gaek gij geiqhauh engq
laeg.

(2 sat)



Fwjmok caeuq nazmbaeklae homh aen mbanj miz daegsaek.

Banh Cisiengz ingj

Lauxdoengz

□ Moz Lijginz / 磨礼勤

Lauxdoengz, dwg dangdieg cungj
hingzsiik caencik beixnuengx dox-
heuh haenx, youq Majsanh, Duh-
anh riuz gig haenq, beixnuengx
ceiq caen, daihngaih dwg caencik,
daihsam couhdwg lauxdoengz. Vunz-
sug caeuq baengzyoux ndawde, miz
gijmaz saehcingz heuh hix ndaej,
mbouj heuh hix ndaej, hoeng
lauxdoengz bietdingh heuh, gij caen
haenx mbouj daemq gvaq caencik
beixnuengx.

Lauxdoengz couhdwg beix-
nuengx gietbaiq, gyaez doiqfueng
couh caensim saed'eiq ciepsouh
doiqfueng.

Song lauxdoengz youq gwnz
dieghong guhhong, bungz daengz gij
hoj guh haenx, song vunz yaeng
baenzlawz guh, Cinz lauxbanj gig

yawjnaek songde, hawj songde daiq-
ban, fucwz guenleix dieghong, gij
gunhyinz couhdwg vunz song mbanj
gyoengqde, mizdi dwg caencik,
baengzyoux, daihgya doxyouq huz-
ndei, lumj ranz vunz ndeu, guhhong
caezsim gaprengz, gaprox baenzlawz
guh vaiq guh ndei.

Lij Danenz samcib haj bi, noh
hausag, fouq heuj de bingz youh hau,
naj cih “田”, bwn'gyaeuj ndaem lumj
maeg, bingzciengz de gyaez roi
bwn'gyaeuj gvaq song mbiengj bae,
danghnaeuz daep gingqda, caen lumj
boux lauxsae, de ak gangj ak buek,
byawz dingq de gangj yaep goj, youq
ndawsim couh haenh de dwg boux
vunz coengmingz, hozswnh gaenh-

vunz, gangjvah coenzcoenz miz leix,
sing'yaem gangjvah doek gwnz namh
bienq baenz singgang danz hwnjdaej
gokladlad, baenzbaenz, de dwg boux
vunz saenq ndaej gvaq haenx, youq
baihrog gyau baengzyoux dij, youq
ndaw mbanj dwg beixnuengx ndei.

Sam

Cinz lauxbanj dwg vunz
Laizbinh Si, hajcib lai bi.

Ngeihcib bi couh daeuj Namz-
ningz dajgoeng, mwh ngamq daeuj
buenq bi gonq de bang saefouh gvet
hoi gyau hoi, fwngz gaem diuz faex
hung raez lumj gaenzgvak ndeu, youq
ndaw doengj cuengq seiqcib gaen
faenjsanghfeih, gya ngeihcib gaen

raemxsaw, seiq gaen raemxgyau,
song fwngz gaem ndaet faex yungh
rengz nyoeg bae nyoeg dauq, dwk
daengz gyau doengj hoi haenx yinz
lumj namhboengz, dawz caxhoi daek
hwnj cat youq gwnz ciengzmienh
mbouj loenq roengzdaeuj, doengj
naez neix caengh naeuz gyau baenz.
Doengj naez neix gyau baenz aeu
buenq diemj cung.

Buenq bi, it bak betcib ngoenz,
ngoenzngoenz gyau hoi, song fwngz
mazmwnh, song gen foeg le, aeu yw
cat, ndwen gvaq ndwen, ngoenz doek
ngoenz, gunghcangj dauqdaej cau ok
gihgi dendung gyau hoi lo, daeg
hauxseng Cinz Giveih lumj duz vaiz
nde baenz ngoenz cae naz ndaej
duet ek. De riengz saefouh hag rox
gvat hoi, bi daihngaih couh baenz
saefouh, geij bi gvaqbae, de sug
naengz baenz giuj, swheij gag
bauhong, ra ndaej cienzngeanz le,
youh ciq beixnuengx aeu di, gag hai
gunghsw hoi hong dajcang, de yied
guh yied hung.

(2)

